

INUIT ATAQATIGIIT

INATSISARTUNI



18. januar 2011

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Qilalukkat piniagaanerinut atatillugu Naalakkersuisut maleruaqqusamik allannguiniarnermini, tassa piniartutut allagartaliinnarnut taamaallaat pisarineqarsinnaalersillugit, tassani Tunu immikkut aalajangersaaviginiarneqarnerluni?
(Inatsisartunut ilaasortaqa Harald Bianco, Inuit Ataqatigiit)

Tunngavilersuut

Naluneqanngitsutut qilalukkat piniagaanerinut atatillugu Naalakkersuisut maleruaqqusamik allannguilersaarput, tassa piniartutut allagartaliinnarnut pisarineqarsinnaalersillugit. Siorna 2010 upernaakkut Inatsisartutunut ilaasortaasimasoq Jakob Skade-lu Inatsisartuni akuerineqartumi siunnersuuteqarpugut, nannut piniagaaneri tunngavilersuutigalugit piniagassat suulluunniit nunatsinni sumiiffinnut naleqqussarlugit piniagaasarneri siunissami aalajangersaaffigineqartalissasut.

Massakkut qilalukkat piniagaanerisa piniartutut allagartalinuunnaq aqqissuussiniarnermi Tunu immikkut pineqartuuppat, tamanna aalajangersakkatigut piffinnut naleqqusaaner-mut aallarnisaatit atorneqaassagalarpoq, imaakkami:

Tunumi Ittoqqortoormiit Tasiilarlu piniartoqarfiugaluarlutik taakkunani piniartutut allagartallit sanitigooralugu pinialuttartunit ikinnerungaatsiarput. Aamma Tunu tamaat isigalugu neqissaqarniarnermi qilalukkat assut pingaaruteqarput.

Pisortatigoortumik paaseqqissaangikkaluarlugu Ittoqqortoormiini piniartutut allagartallit ullumikkut qilit tyvillu akornanniipput, Tasiilami eqqaanilu aamma taamaapput. Tassa sionatigut piniartutut inuutissarsiutillit suliffittaartorlutik saniatigooralugu taamaallaat piniartalernikuugamik, taamaalilluni piniartutut allagartallit ikiligaluttuinnarlutik.

Ittoqqortoormiini aasaq manna qilalukkat 30 - 40 missaat pisaapput, taakku affaasa missaat saniatigooralugu pinialuttartunik pisarineqarput. Tasiilami eqqaanilu qilalukkat pisarineqartut allattorsimasut qulit missaaniipput, kisiat ukiup naannginnerani naluneqanngilaq suli nalunaaruteqartoqartussaasoq. Taakku aamma affaasa miss. Sanitigooralugu pinialuttartunik pisaapput.

Tasiilaq eqqarsaatigalugu, nutaamik aalajangersaanermi aamma Tunu ilanngunneqassappat, qilalukkat maani pisaasartut ikittuarangussapput. Tassami maani aasakkut avannatsinnut ungasissumut qilalugarniartarput, imaappoq anginerumaanik angallatillit kisimik taamak ungasitsigisumut qilalugarniartarput. Piniartutut allagartallit ilaminiinnanngui anginerumaanik angallateqarput, ilarpasui saniatigooralugu pinialuttartunut ilaasuullutik aasakkut avannatsinnut qilalugarniartarput. Tassa nutaamik aalajangersaaneg maanga aamma atuutilissappat, maani Tasiilap eqqaani pisaasartut maannamiit affaat inorujussuarlugit pisaasalissapput. Tamanna neqissaqarniarnikkut maanga anner-tuumik ajortumik kinguneqassaaq.